

Dithero tsa Tirelano mo Kutlwanong

17/2015 Thero ka Sontaga e e bidiwang Okuli, e le ka 15. 03. 2009

MO LEINENG LA MODIMO O E LENG RARA LE MORWA LE MOWA O O BOITSHEPO!

Lefoko le le okamelang beke eno, letsatsi le, le kwadilwe mo go Joh. 12:24, le re: **"Ammaaruri, ammaaruri ke lo raya ke re: Fa tlhaka e sa wele mo mmung ya swa, e tla nna e le yosi; mme fa e swa, e ungwa leungo le legolo.**

1. Sefela sa 302 - 277/284

2. Thapelo: Morena Jesu Keresete, re a go leboga, ka o laleditse le rona gore re go sale morago. A o ko o re thuse ka Mowa o o Boitshepo wa gago gore re kgone go go sala morago ka tshwanelo, re kgaogane le tsotlhe tsa lefatshe, re go sale morago, yo o leng Kgosi ya dikgosi, le Morena wa barena. Amen.

3. Lefoko la Testamente e kgologolo le kwadilwe mo go 1 Dikg. 19:1-13a;

Epistolo ka fa thulaganyong ya 2 e kwadilwe mo go Baefeso 5:1-8a;

Efangele ka fa thulaganyong ya 3 e kwadilwe mo go Mareko 12:41-44.

4. A go ipolelwe tumelo ya bokeresete!

5. Sefela sa 283 - 265/271

6. Thapelo ya mmadi wa thero.

7. Efangele ka fa thulaganyong ya 1 e kwadilwe mo go Luka 9:57 - 62, e re: "Erile ba ntse ba tsamaya mo tseleng, mongwe a mo raya a re: Ke tla go sala morago gongwe le gongwe kwa o ka yang teng. Jesu a mo raya a re: Diphokojwe di na le mesima, le dinonyane tsa loapi di na le dintlhaga; mme Morwa-Motho ga a na fa a ka latsang tlhogo teng. Jesu a raya yo mongwe a re: Ntshale morago! Yoo a re: Morena, ntetlelele ke ya go fitlha rre pele. Jesu a mo raya a re: Lesa baswi ba fitlhe baswi ba bone; mme wena tsamaya, o phatlalatse tsa puso ya Modimo. Yo mongwe le ene a re: Morena, ke tla go sala morago; mme ntetlelele

pele go laelana le ba lapa la me. Mme Jesu a mo raya a re: Ga go ope yo o ka nonofelang puso ya Modimo, fa e ka re a tshwere mogoma, a gadima kwa morago." Amen.

8. Thero: Phuthego e e rategang mo Moreneng wa rona Jesu Keresete, tlang, a re dudueletseng Morena, re ipeleleng lefoko la pholoso ya rona! Gonne MORENA ke Modimo o mogolo, bogolo go medimo le barena botlhe. Ee, ke maikaelelo a Lefoko la Morena gore re tle go Jesu, re tlogele tsotlhe, re mo sale morago yo e leng Kgosi ya dikgosi. Ka Efangele ya kajeno go buiwa gararo

ka ga go sala Jesu morago jaana:

1. Lefoko le re: "Erile ba ntse ba tsamaya mo tseleng, mongwe a mo raya a re: Ke tla go sala morago gongwe le gongwe kwa o ka yang teng." Motho yoo a kgetha se sentle tota, go sala Jesu morago. A tshwana le Maria yo o neng a ikgethela go nna fa dinaong tsa ga Jesu. Jesu a mmoka, a re: O itlhaoletse kabelo e e molemo, e e se kitlang e tloswa mo go ene. Le barutwa ba ga Jesu ba kgetha go mo sala morago, ba tlogela tsotlhe. Ee, le rona badumedi re kgethile go sala Jesu morago, fa re ne re kolobediwa, le mo tlhomamisong, le kwa re ipolelang tumelo ya bokeresete sešwa teng. Le kajeno le rata go re thusa tota gore re tlaloganye sentle gore go sala Jesu morago gongwe le gongwe ke go reng? Jesu a tlhalosetsa motho yole a re: Diphokojwe di na le mesima, le dinonyane tsa loapi di na le dintlhaga, mme Morwa-Motho ga a na fa a ka latsang tlhogo teng. Fano Jesu o tlhalosa botshelo jwa gagwe mo kemong ya boikokobetso, a re: Botshelo jwa ditshedi tsa naga bo molemo bogolo go jwa gagwe. Diphokojwe le dinonyane di na le felo kwa di ka ikhutsang teng, mme ene ga a na kwa a ka latsang tlhogo teng. Ke gona re gopolang botsalo jwa gagwe, a tlhoka manno mo ntlong ya baeti, a ladiwa mo segopong sa dipitse. Ka letsatsi le lengwe a tlhoka dijo, a ya go batla leungo la mofeie, a le tlhoka, a bolawa ke tlala, a bolawa ke lenyora. Mme ka dinako tsotlhe o tlhoka manno mo dipelong tsa batho ba le bantsi. Khumanego e kgolo mo go kalo mo go Jesu motho ga a ka ke a e itshokela, fa e se ka thata ya Mowa o o Boitshepo o o thusang gore re lemoge gore mohumanegi yo mogolo yo ke Morena wa barena, ke Morepholosi.

Re tshwanetse go mo sala morago. Mowa o o Boitshepo o re biletsa mo go ene ka Efangele ya gagwe.

Motho yoo yo o ikopetseng go sala Jesu morago kwa a ka yang teng, fa re buisa mo go Matheo, re bona gore e ne e le moruti wa molao. Baruti ba molao e ne e le baitimokanyi ba bagolo, ba ne ba emalalana le Lefoko la Efangele ya ga Jesu, le pitso ya Mowa o o Boitshepo o o bileditseng batho go sala Jesu morago. Ba ne ba sa lebelele gore Mesia o tla nna mo kemong ya boikokobetso jo bo kalo, ba lebeletse Mesia yo o nang le bogosi le kgalalelo ya lefatshe, a ba dira gore ba buse, ba galalediwe mo lefatsheng le mo merafeng. Yo o gopolang jalo o tla palelwa ke go sala Jesu morago, gonne ene a re: Fa mongwe a rata go ntshala morago, a a itlogele, a sikare sefapaano sa gagwe, a ntshale morago. Le Paulo a re: Boitlhomong jo bo tshwanetseng go nna mo go lona, ke jo bo neng bo le mo go Keresete Jesu le ene, yo e rileng a le mo tshwanong ya Modimo, a se ka a kaya go tshwana le Modimo jaaka thopo, mme a ikamoga ka go tshola tshwano ya motlhanka, a ikokobetsa. Ka boikokobetso jwa gagwe, le ka khumanego ya gagwe Jesu o re baakanyeditse gore re hume rona ka fa Lefokong le le reng: Le fa Jesu a ne a humile, o ne a humanega ka ntlha ya lona gore lo hume ka khumanego ya gagwe.

2. Thuto ya bobedi ya kajeno e bonala mo ditemaeng tsa 59-60 kwa Jesu a bolelelang yo mongwe teng a re: "Ntshale morago!" Ka Lefoko leo Jesu e bile o biditse le barutwa ba e neng e le batshwari ditlhapi, le mokgethisi Matheo. Ke Lefoko le re bidiwang ka lona rotlhe ke Rara yo o mo legodimong, gonne ga go na yo o ka tlang go Jesu, fa e se yo o gogiwang ke Rraagwe. Ke bopelotlhomogi le lorato lo lo gakgamatsang, fa rona baleofi re bileliwa mo pholosong e e mo go Jesu Keresete. Tota ke tshwanelo gore re se ka ra diega go tla go Jesu Morepholosi, mme motho yole yo re utliwang ka ga gagwe, o ne a araba, a re: Morena, ntetlelele ke ye go fitlha rre pele. Ga re itse gore a rraagwe o ne a tlhokafetse ka nako eo, gongwe o ikopetse fela go nna kwa gae, go ya rraagwe a tloge mo lefatsheng leno, a tle a kgone go dira tsa kwa ga gabo. Jesu ga a nyatse fano taolo ya bone, mme o batla go supa bogolo jwa Efangele kwa godimo ga molao, bogolo jwa pholoso bogolo go tse dingwe, a re: Lesa baswi ba fitlhe baswi ba bone. O bua ka bontsi. Baswi ba fitlhe baswi ba bone. Go bonala gore ditopo ga di ka ke tsa fitlhana, gonne di sule. Go a bonala gore mafoko ao a

raya ba ba sa dumeleng mo go Jesu, ba ba se nang pholoso. Ke bone baswi. Jesu a raya morutwa yole, a re: Lesa ba ba sa dumeleng gore ba fitlhane ka nosi, mme tiro ya gago ke yona e: Tsamaya, o phatlalatse tsa puso ya Modimo. Tiro e kgolo e ba ba salang Jesu morago ba bileditsweng mo go yona ke go rera puso ya Modimo, Efangele e e leng thata ya Modimo go nna pholoso ya mongwe le mongwe yo o dumelang. Jesu ke tsogo le botshelo. Yo o dumelang mo go ene, o tla tshela, le fa a ka swa. Madi a ga Jesu Morwa Modimo a re itshekisa mo maleong otlhe. Ke se re se laotsweng rotlhe gore re phatlalatse tsa puso ya Modimo e e tlileng ka Jesu Keresete, re rapelele tiro eno, re e ntshetse dikabelo tsa rona gore e tswelele, re romele makau a rona mo seminareng gore ba ithutele tiro eo. Thobo ke e kgolo, mme badiri ba tlaetse. Ke gona Jesu a re laelang rotlhe kajeno, a re: Lo ntshaleng morago! Ke ka bopelotlhomogi, fa re bidiwa. Ke ka jona, fa re fiwa go rera puso ya Modimo. A re se ka ra diega jaaka lekau lele. Tlang, borra, bomma, makau, makgarebe, bagolo, lotlhe, letsatsi le ise le phirime. Tlhokomelang, lo sa ntse lo bidiwa.

3. Thuto ya 3 re e utlwa mo ditemaneng tsa 61-62, e re: Yo mongwe le ene a re: "Morena, ke tla go sala morago; mme ntetlelele pele go laelana le ba lapa la me!" Le ene ga a gane go sala Jesu morago. Le fa go ntse jalo, o ne a na le kopo go Jesu gore a mo dumelele go laelana le ba ga gabo. Ga re itse gore o ne a rata go dirang kwa gae. Ka gongwe re ka bona sekao mo Testamenteng e kgologolo, mo go 1 Dikgosi 19:19-21. Karabo ya ga Jesu e emalalana le botlhe ba ba latlang phatlha ya go tlabologa ka ntlha ya mabaka a bone, le botlhe ba ba ikepileng mo tumelong ka ntlha ya dilo tsa lefatshe, le botlhe ba ba tlogelang tiro ya Morena ka ntlha ya mabaka a bone, a re: Ga go ope yo o ka nonofelang puso ya Modimo, fa e ka re a tshwere mogoma, a gadima kwa morago. Lefoko le le tshwana le lona le le reng: Ga go ope wa banna bao, ba ba laleditsweng yo o tla utlwang moletlo wa me. Go kgaogana le Jesu nakonyana fela, gongwe dikgwedinyana fela, gongwe dingwaganyana fela ke se se boitshegang mo go maswe, ke kotsi tota e e bosula, gonne ka nakonyana eo Satane o tla dira ka thata yotlhe gore motho yoo, a mmofelele ruri mo pusong ya gagwe ya lefifi gore a se ka a tlhola a kgona go tswa mo go yona, a tle a latlhegelwe ke puso ya bopelotlhomogi e a e baakanyeditsweng ke Jesu Keresete ka dipogo tsa gagwe,

ka loso lo lo bokete lwa gagwe, e re amogelwang mo go yona ka Lefoko le ka disakaramente tse di boitshepo tsa gagwe. Ke gona re rapelang ka metlha, fa re atamela mo selalelong sa Morena, re re: Morena Jesu Keresete, re iphitlha mo dinthong tsa gago, o se dumele gore re kgaoganngwe le wena, o re golole mo mmabeng yo o bosula, o re bolokele mo tumelong e e tlhomameng gore re go galaletse, re go boke mmogo le baitlhaoledwi botlhe ba gago ka bosakhutleng. Amen.

9. Thapelo: Morena Jesu Keresete, o re utlwise monate wa go nna le wena mo pusong ya bopelotlhomogi ya gago, re tle re amogelwe morago le mo pusong ya kgalalelo ya gago ka bopelotlhomogi jo bogolo jwa gago, ka lorato lo logolo lwa gago lo lo senotsweng ka botsalo, ka dipogo, ka loso, le ka tsogo ya gago, Morepholosi yo o rategang. Amen. Thapelo ya Morena: Rara wa rona yo o mo legodimong ...

10. Sefela sa 255 - 237/247

A kagiso ya Modimo e e fetang tlhaloganyo yotlhe e boloke dipelo tsa rona le maikutlo a rona mo go Keresete Jesu, Morena, Morepholosi. Amen.

Thero eno e kwadilwe ke J. T. Mathebula, ka ngwaga wa 1987, ya rongwa ka 2003/le ka 2009.

Kgatiso le go rongwa ga dithero tseo go tshegediwa ke kopano e e bidiwang The Lutheran Heritage Foundation.